

Sistem Pendidikan Negara Perlu Melebihi Tahap Cemerlang, Kata Muhyiddin Bernama
15 Oktober, 2011

SEREMBAN, 15 Okt (Bernama) -- Dalam memastikan negara mampu melahirkan tenaga kerja yang mahir dan berpengetahuan menjelang tahun 2020, adalah menjadi hasrat kerajaan supaya sistem pendidikan negara melebihi tahap cemerlang, kata Timbalan Perdana Menteri Tan Sri Muhyiddin Yassin.

Beliau berkata semua sekolah di negara ini sewajarnya tidak meletakkan penanda aras pencapaian mereka hanya sekadar pada tahap 100 peratus sebaliknya perlu lebih tinggi daripada itu seperti 110 peratus.

"Jadi penting juga untuk semua Institut Pendidikan Guru (IPG) meletakkan sasaran lebih tinggi daripada biasa untuk merealisasikan usaha kerajaan melahirkan modal insan dan tenaga kerja yang berkualiti, terlatih, berilmu dan berkemahiran, dapat dicapai.

"Ini kerana peranan IPG penting untuk melahirkan tenaga pengajar berkemahiran dan berkualiti, sekaligus membantu menjana modal insan yang mempunyai kemahiran, terdidik dengan akhlak dan sahsiah yang baik," katanya semasa menyampaikan amanat sempena lawatan kerja ke IPG Kampus Raja Melewar di sini Sabtu.

Muhyiddin yang juga Menteri Pelajaran berkata usaha ini penting memandangkan Malaysia hanya mempunyai 23 peratus tenaga mahir daripada keseluruhan tenaga kerja di semua sektor pekerjaan.

Sementara itu, dalam sesi dialog akademik, Muhyiddin berkata Kementerian Pelajaran tidak mengamalkan sikap pilih kasih sebaliknya apa sahaja pengiktirafan yang diberikan adalah berdasarkan kepada pencapaian setiap sekolah.

"Adalah tidak adil untuk membuat sebarang tuduhan, tetapi sekiranya ada bukti jelas mengenai sistem yang dibuat kementerian telah dimanipulasi sila kemukakan dan saya sendiri akan selidik," katanya sebagai menjawab pertanyaan mengenai wujudnya sikap pilih kasih antara Sekolah Berasrama Penuh dan Sekolah Menengah Harian.

Dalam sesi soal jawab itu juga, Muhyiddin berkata kementerian bersedia untuk mengkaji cadangan hanya calon yang peratusan kedadatangan sekolah mencapai 80 peratus sahaja dibenarkan menduduki peperiksaan awam Sijil Pelajaran Malaysia (SPM).

Sebelum itu, Muhyiddin turut melancarkan Kebitaraan Sukan IPG Kampus Raja Melewar, Kampus Tun Abdul Razak, Sarawak dan IPG Kampus Perlis sebagai penggerak Dasar 1Murid 1Sukan.

Objektif IPG Sukan itu bermatlamat supaya setiap guru pendidikan Jasmani yang dilahirkan bakal memiliki sekurang-kurangnya tiga sijil kejurulatihan, kepegawaian dan pengadilan daripada badan-badan sukan bertauliah.

Dalam ucapannya Muhyiddin berkata usaha itu selain dapat membina sahsiah dan kesejahteraan hidup serta memartabatkan sukan negara, ia juga dapat mengembalikan kemeriahan sukan di sekolah sebagaimana pada tahun 60-an dan 70-an.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=620094>